

清·方略館 編

清代 方略 全書

北京圖書館出版社



清代方略全書

一九七

清·方略館編

北京圖書館出版社

清·奕訢等撰

欽定平定雲南回匪方略

卷三九——五〇

清光緒二十二年（一八九六）鉛印本

欽定平定雲南回匪方略卷三十九 己巳年

九月初十日

戊寅

岑毓英奏言

臣

查附省逆匪占

踞後路各城援賊往來不絕又有鹽井以資其
用故敢於抵死不退非分兵收復各鹽井並奪
回各要隘軍務難望得手查昆陽州屬之海口
地方與碧雞關等處毗連爲昆池瀉水之處四
面懸巖中有二十八村其中灘新街二村尤爲

險要逆首楊振鵬現踞昆陽州城分黨踞守該處相爲犄角臣派岑毓英帶領兵勇二千餘名會合張保和一軍進剿先將海口二十六村收復七月十五日新街中灘賊巢均經官兵攻破先後斬擒悍賊及撲水死者不計其數海口一律肅清李維述亦於是日分派都司張士進等帶兵二千餘名由祿豐進攻鹽井先將秧草地

賊壘攻破十六日乘勝連克鸚哥哨一帶賊壘
二十餘座殪賊無算立將元興井克復並分克
草溪井阿陋井追賊至廣通縣屬之捨資汛地
方亦將該處賊壘攻破僞大司旅馬錫晉收集
餘匪踞守永濟井官軍奮力環攻十九日馬錫
晉赴張士進軍前乞降當將永濟井收復楊玉
科等軍亦次第攻克黑井琅井所獲賊鹽均分

賞出力兵勇及祿豐各營士卒李維述於捨資克復後探悉祿豐賊匪因迤西大路被官軍截斷分黨潛越山徑繞出廣通縣屬之羅川地方卽派軍前往攻剿於二十二日將該處賊壘攻破進攻廣通縣城岑毓寶於海口克復後率隊馳赴安甯連克小村草鋪一帶賊營碉樓二十餘座進攻安甯州城其圍攻易門縣城之何秀

期迅速克復至附省賊壘臣親督各營逐日攻

勦務將此股逆匪聚而殲旃則迤西各城均不

難於恢復其澂江昆陽新興等處更可迎刃而

解矣所有各處出力人員及陣亡文武員弁容

臣查明分別彙案奏懇

恩施奏入

上命軍機大臣傳諭劉嶽昭岑毓英曰雲南附省賊匪

屢恃後路聲援未斷並有鹽井以資其用築壘抗拒官兵現經岑毓英派令李維述等節節進剿次第將易門縣城及黑琅等處鹽井收復並攻破海口等處賊巢剿辦尙屬得手卽著岑毓英飭令田仲興各軍會合岑毓英等乘勝進攻迅將安甯州城克復次第規取昆陽新興該撫務當親督各軍將附省賊壘悉數掃除毋留餘孽並著劉嶽昭懷遵疊次諭旨將省

城剿匪事宜與岑毓英會商辦理唐友耕一軍近日
剿賊情形若何並著查明具奏

十七日

乙酉

劉嶽昭奏言

臣

查昭通魯甸漢回構

釁緣唐友耕原籍昭通所部名爲川軍實俱滇

練昭通民本强悍漢回又夙有嫌隙增以唐軍

六千之衆遂有恃而不恐共以復仇爲詞請留

援軍先辦昭回於是魯甸威甯各處回民間風

據險疊出剽掠東昭大路遂多梗塞

臣

已飭署

昭通鎮總兵全祖凱等馳往體察情形相機辦理詎料全祖凱到後唐軍已與回衆接仗數次互有損傷全祖凱暫就龍寶山要路紮營亦經回衆前來攻撲勢將不可收拾惟此次回民倉卒生變始因滅回之謠繼求自全之計與他處公然叛逆者不同

臣

現咨請崇實吳棠催令唐

友耕迅卽拔隊援省毋爲浮言所動一面飭全
祖凱明予解散暗爲隄防並加派前署昭通鎮
總兵楊盛宗添募勁練一千名前往會辦如唐
友耕業已開拔而昭魯回民依然負固自當立
予殲除設或唐友耕擁兵不進依違其閒旣已
開釁於事前復置省圍於不顧臣亦當會同撫
臣據實奏叅現在尋甸善後漸次告竣臣定於

八月二十六日起程進省與撫臣提臣會籌一

切和衷共濟以期迅解城圍

劉嶽昭又奏言據岑毓英等稟報該軍圍攻安

甯州城自八月初八日攻破城外賊壘後督率

兵勇晝夜攻城賊匪軍火將盡槍礮漸稀十七

日官軍四面架梯登城鏖戰多時殲賊甚衆餘

匪由西門衝逃經何秀林沿途截殺擒斬殆盡

安甯州城內外一律肅清

同日岑毓英奏言據各路軍營稟報楊玉科等

軍於八月初六初七等日次第攻克大姚廣通

縣城附省賊匪後路被阻十分驚惶

臣督各營

官兵晝夜進攻每於陣前宣示首先獻營出降

者免死十二日

臣

同李家福在南門外督戰提

臣馬如龍創口未愈亦力疾同赴陣前適有賊

目段成功隻身前來乞降據稱南門外西嶽廟
一帶賊壘碉樓二十餘座均係該目所轄願將
各營獻出以斷江右館賊匪後路臣許以立功
贖罪該目導引官兵立將各營一律換紮復隨
同進攻未降賊壘是夜官軍皆未收隊臣會同
馬如龍李家福督率任士斌等圍攻南面江右
館各賊壘鍾福俊等攻其西熊遇周等攻其北

劉步龍等由桃園兜剿普吉賊壘馬忠由灰灣
西山攻碧雞關韓璉由墨雨龍潭攻花紅園官
軍人人奮勇十四日自丑刻至亥刻攻破南面
天台寺一帶賊壘二百餘座斬擒無算惟逆首
楊崇章安文義蔡廷棟等率悍賊千餘名踞北
門外江右館大街米曠山率黨五千餘名踞北
門外之馬村劉成率黨二千餘名踞西門外之